



22. januar 2015

UKA 2015/110

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naalackersuisut ikiaroorartunik Kalaallit Nunaannut eqqussuineramik akiuiniarnerup nakussassarneqarsinnaanera pillugu kingusinnerpaamik UKA2016-imi nassuiaammik saqqummiussinissaannik pisussaaffilerneqarnissaannik Inatsisartuni aalajangiiffigisassatut siunnersuut. Tassani allaaserineqassaaq ikiaroorartunik eqqussuineramik akiuineq qanoq nakussassarneqarsinnaanersoq, tassani ilanngullugu tamanna pillugu qallunaat naalackersuisuinik isumaqatiginninniarnaq. Nassuiaammi aallaaserineqassaaq suliniutit qanorpiaq ittut atorlugit Kalaallit Nunaannut avataaniit tikittunik, pisattanik nassiuusanillu nakkutilliineq pitsaanerulersinneqarsinnaanersoq, tamatumalu aningaasaqarnermut inuiaqatigiinnullu sunniutai suusanersut.
(Inatsisartuni ilaasortaq Agathe Fontain, Inuit Ataqatigiit)

Tunggavilersuut:

UPA2010-mi Naalackersuisut piumaffigineqarput Kalaallit Nunaannut ikiaroorartunik eqqussuineramik akiuinerup nakussassarneqarnissaa pillugu suliniuteqaqqullugit, tamatumani aamma qallunaat naalackersuisuinik isumaqatiginninniarnaq aqqutigalugu (UPA2010/22). Innersuussutigissavara Inatsiseqarnermut ataatsimiititap siunnersuut taanna pillugu isumaliutissiissutaa sukumiisoq.

Inatsiseqarnermut ataatsimiititap isumaqatigiissup siunnersuutip akuerineqarnissaa inner-suussutigaa Naalackersuisullu qinnuigalugit suliap qanoq ingerlanera pillugu nassuiaa-teqaqqullugit. Nassuiaat eqqartorneqartoq uanga ilisimasakka malillugit suli nassiuune-qarsimanngilaq, iliuuseqartoqarsimassappallu suliniutit qanoq ittut aallartinneqarsimanersut ersarissumik paasinarnani.

Naalackersuisut § 37 naapertorlugu kingusinnerusukkut apeqquteqaammut akissummi paasissutissiipput¹:

”Suliniutit pitsanngorsarniarlugit periarfissaq tassaasinnaavoq misissuisarnerup tiguisartumiit nassiuussisumut nuunneqarnera. Tamanna Kalaallit Nunaata aamma Danmarkip akornanni naalackersuinikkut ingerlatsisuni isumaqatigiissuteqarnissamik pisariaqartitsivoq, qularnanngitsumillu taakkunani marlunni nutaanik inatsisiliortoqartariaqassagunarluni. Kalaallit Nunaata soorunami misissuineranut aningaasartuuteqartussaassaaq.

¹ Apeqqut 156-2011. Akissut ullulerneqarsimavoq 30. august 2011, Sagsnr. 2011-054326

Annissuinerup nalaani nakkutilliinerup isumalluutininik atuineq pitsaanerulersis-sinnaavaa, tassa nioqqutissat inuillu amerlanerpaartaat Aalborgimiit (umiarsuarmik) imaluunniit Københavnimiit (timmisartumik) aallaaveqarmata.”

Naalackersuisut akissutaanni atuarneqarsinnaasutut suliniutininik annertusaanerup, taakkununga ilaalluni qallunaat oqartussaqaarfiihinik suleqateqarneq, Landskarsip aningaasartuuteqarnerulerneranik kinguneqarnissaa naatsorsuutigineqarpoq.

Taamatuttaaq nakkutilliineq tamarmi nassiussivimmut nuunneqassappat tamatuma maani suliffinnik naleqarnissaa ilimagisariaqarpoq.

Aningaasaqarnikkut suliffissaqarniarnikkullu sunniutigisinnaasai pitsaanerumillu nakkutilliinerup iluaqutaasinnaanera imminnut naleqqersorsinnaajumallugit isumaqarpunga pissusissamisoortoq Naalackersuisut piunaffigissagaanni suliniummut pitsanngorsaataasunik ersarissunik tunngavilersorluakkanillu saqqummiuseqqullugit, tamakku aningaasaqarnermut kingunerisinnaasai ilanngullugit.

Pisortanut aningaasaqarnikkut allaffissornikkullu sunniutissai:

Ilimanarpoq Akileraartarnermut Aqutisoqarfimmi aamma Aningaasaqarnermut Nunamullu Namminerumut Naalackersuisoqarfimmi ilisimasarpasuit poriissasut nassuiaammut kissaatigineqartumut atorneqarsinnaasut, taamalu suliamut aningaasartuutininik annikillisaataasinnaanissaat ilimanarluni. Isumaqarpungali nassuiaat ima pitsaatigalunilu sukumiitigissappat paasissutissanik aalajangiinissamut tunngavissisinnassalluni, minnerpaamik inuup ataatsip ukiup affaanut suliarisinnaasaasa nalinganik immikkoortitsiviusariaqassasoq, tassani ilaalluni nutserneqarnissaa.

Namminersorlutik suliffiutilinnut aningaasaqarnikkut sunniutigisinnaasai:

Nassuiaatit suliarineqarnissaa namminersorlutik suliffiutilinnut aningaasaqarnikkut allaffissornikkulluunniit toqqaannartumik sunniuteqarnavianngilaq.

Innuttaasunut aningaasaqarnikkut allaffissornikkullu sunniutigisinnaasai:

Nassuiaatit suliarineqarnissaa innuttaasunut aningaasaqarnikkut allaffissornikkulluunniit sunniuteqarnavianngilaq.